

Pita

ndê bapia ñamata-ña

Yom whê bapia dindec sa-ña

Ñgac nañ to bapia dindec iñ Pita, Yisu ndê aposel dañ. Iñ to têtj lau sêkêtj whiñ-ña nañ sêmbo babalip tòm gameñ hoñ nañ lau Rom-ña sem gôliñ. Lau dau sêhóc ñawapac daêsam, ma lau sêkêtj kisa ñac tu sêkêtj whiñ Yisu-ña.

Pita tac whiñ bu puc ñac dôñ, bu sêlhac ñaña ma ti atac ñayham tu mwasiñ atu ti ñawasi atu nañ Anötö gic bata tu ñac-ña yêc undambê. Tòm Anötö uñ Yisu sa akêtj lau batê-ña, nañ oc kôm têtj ñac bocdinañ. Iñ to yom pi ñandê ti ñawapac daêsam nañ Yisu hóc têtj ndoc iñ mbo nom, ma sôm bu lau nañ sêñkuc Yisu, nañ sêwêkaiñ iñ ndê lêtj dinañ. Iñ whê sa bu ñawapac tidau-tidau gitôm bu puc ñac dôñ, ma tiñambu têtj ndoc Pômdau mbu meñ, nañ ñac oc sêtap waê atu sa. Ma Pita to yom pi lêtj ñayham ma dabuñ bu lau sêkêtj whiñ-ña sêñkuc.

Pita gic hu ndê bapia ñamata-ña

1 ¹Aô Pita, Yisu Kilisi ndê aposel, gato bapia dindec têtj mac lau nañ Anötö kêyalin mac sa, mac lau nañ ambo nom atôm lau apa, ma andöc babalip yêc gameñ Pontus, Galesia, Kapadosia, Esia ma Bitinia-ña. ²Damañ Anötö kêyalê gêtj hoñ muñ su, dec kêyalin mac sa bu Yisu Kilisi ndê dac êñgwasin mac nem sac hoñ su, ma bu ñalau Dabuñ kôm mac ati lau dabuñ, nañ dañam wambu Kilisi ñapep. Mwasin ti yom malô akêtj Anötö êñsalê mac ahuc.

Yom pi Anötö ndê mwasiñ atu nem yac si-ña

³Tampiñ Anötö, yac neñ Pômdau Yisu Kilisi ndê Damba. ñahu bu iñ tawalô yac ndu andô, dec kôm yac datiwakuc. Gêtj dau ñandô sa bocdec bu, iñ uñ Yisu sa akêtj lau batê-ña, ma piñ yac dôñ tam damin iñ, ma bocdinañ dec yac dakêtj batan ñandô ñayham kêlêc, nañ bu oc dandöc tanli ñapan. ⁴Ma dawêkaiñ gêtj lêtj sêm ñayham, nañ ndê ñawasi oc niña dom, ma tòm dom bu tisac me hê su. Anötö po gêtj dau sa gwanan tu

mac-nga yêc undambê. ⁵Mac atap Anötö ndê mwasinj nem mac si-nga sa su, ma inj kêmasanj mwasinj dau ña-ñandô su ma hôñ têm bu tôc ñandô dau asê tiawê têtj bêc ñambu-nga. Ma tu mac nem akêtj whinj-nga, dec Anötö ndê ñaclai oc yob mac e atap ñandô dau sa.

⁶Aö kayalê bu mac ambo ti atac ñayham atu ñapañ tu Anötö ndê mwasinj hoñ dinañ-nga. Magoc aö kayalê bu ñawapac daêsam tap mac sa têtj ñasawa dindec, dec kôm mac nem ñalôm ñawapac whinj. Mac ac waê bu atap gêtj dau sa, magoc inj gêtj ñasawa apê-nga eñ. ⁷Mac añyalê bu lau sêpec gol tu bu ñadômbwi ninga ma gol ñawasi solop gacgeñ yêc. Ma ñalêtj tigenj, ñawapac nañ tap mac sa, nañ meñ bu êñsahê mac nem akêtj whinj. Anötö gêlic mac nem akêtj whinj bu gêtj ñandô, gitôm gêtj ñaôli atu, nañ hôc gêlêc gol nañ oc ninga whinj nom dindec, nañ su. Ma mac bu ahôc ñawapac ma asap nem akêtj whinj dôñ ñanga, dec têtj ndoc Yisu Kilisi mbu meñ têtj bêc ñambu-nga, nañ inj oc toc mac sa ma kêtj waê ti ñawasi ñayham têtj mac. ⁸Mac nem dañ gêlic Yisu pi tandô dom, têtj ñamata-nga e meñ têtj kwahic dec, magoc mac atac whinj inj ma akêtj whinj inj ambo. Ma mac nem atac ñayham tu inj-nga inj gêtj atu andô, ma hôc gêlêc ñamalac si gauc me yom tu awhê sa-nga. ⁹Ma ndoc meñ kêpiñ bu mac atap Anötö ndê mwasinj nem mac si-nga ña-ñandô sa, nañ ti mac nem akêtj whinj ñahu.

Propet sêhoc Anötö ndê lêtj nem yac si-nga asê

¹⁰⁻¹¹Lau propet sêhoc yom asê muñ su, pi mwasinj nañ mac atap sa su. Kilisi ndê ñalau mbo ñac si ñalôm, ma kêgilí ñac bu sêhoc yom asê pi Anötö ndê lêtj nem lau si-nga. ñalau dau hoc asê têtj ñac gwanañ su, bu Anötö ndê Mesaya oc hôc ñandê, ma tiñambu tap ñawasi atu sa. Magoc ñac sêñyalê têm ti ndoc ma ñalêtj su dom, ma tu dinañ-nga dec sêkôm ñanga bu sêkip ñahu sa. ¹²Ñalau tôc asê têtj lau propet bu yom nañ sêhoc asê, nañ tu ñac dau-nga dom, magoc sêhoc asê gwanañ tu sênem mac sa-nga. Ma lau nañ sêhoc ñawaê ñayham asê têtj mac, nañ sêwhê yom dau sa ña ñalau Dabuñ nañ Anötö kêtj sip akêtj undambê meñ, nañ ndê ñaclai. Gêtj hoñ nañ propet sêhoc asê, nañ Anötö ndê añela bocdinañ tac whinj ndu andô bu sêñyalê ma sêlic ñandô.

Dasa lêtj dabuñ dandic ñawaê

¹³Tu dinañ-nga dec akôc gauc ñapep pi lêtj bocke inj lêtj solop tu asa-nga, ma ambo ti nem gauc ñawa. Akêtj Batam ñapañ ti tamkwê mwasinj atu nañ mac oc atap sa têtj bêc nañ Yisu oc hoc dau asê. ¹⁴Mac ati Anötö ndê balêkoc solop, dec dañam wambu inj ñapep, ma ahu mêtê sac hoñ nañ mac akôm têtj ndoc mac am gauc Anötö, nañ siñ. ¹⁵Anötö nañ kêgalêm mac sa ati inj ndê, nañ inj dabuñ andô. Tu dinañ-nga dec ayob daôm nem lêtj hoñ bu akôm mêtê dabuñ eñ, atôm inj dau. ¹⁶Bu sêto Anötö ndê yom yêc bocdec bu:

Aö Anötö dabuḡ, bocdinaḡ asa nem lêḡ dabuḡ eḡ. [Lev 11:44-45]

¹⁷Ambo nom atôm lau apa, ma atöc Anötö ma atoc iḡ sa ḡapep. ḡahu bu Anötö, naḡ mac ata bu Damaḡ, naḡ oc toc ḡamalac daḡ sa hóc gêlêc daḡ dom, têḡ ndoc iḡ êḡsahê lau hoḡ pi ḡac si lêḡ. Iḡ oc êḡsahê lau hoḡ ḡa dôhôn tigeḡ. ¹⁸Muḡ-ḡga mac atôm lau akiḡ mêtê sac-ḡga, tu lêḡ gauc mbasi-ḡga naḡ apami sic dulu têḡ mac. Magoc Anötö gêmlhi ti kêḡapwêc mac su yêc sakiḡ mêtê sac-ḡga dinaḡ. Iḡ gêmlhi mac su, ḡa gêḡ naḡ oc niḡga whiḡ nom dindéc gitôm gol me silba, naḡ dom. Mba. Mac aḡyalê su bu ¹⁹iḡ gêmlhi mac su ḡa Kilisi ndê dac, naḡ hóc gêlêc gêḡ ḡaôli atu-tu nom-ḡga hoḡ su. Kilisi kêḡ dau ti da gitôm domba ḡawasi ḡayham naḡ ḡasac mbasi. ²⁰Anötö kêyaliḡ iḡ sa têḡ ndoc iḡ kêḡ undambê ti nom su dom, ma tóc iḡ asê tiawê têḡ têm ḡambu-ḡga dindéc, tu mac-ḡga. ²¹Ma tu gêḡ naḡ Kilisi dau kôm tu mac-ḡga, dec mac akêḡ whiḡ Anötö, naḡ uḡ iḡ sa akêḡ lau batê-ḡga, ma kêḡ ḡawasi atu têḡ iḡ. Bocdinaḡ kwahic dec Anötö ti mac nem akêḡ whiḡ ḡahu, ma mac akêḡ batam bu atap mwasiḡ atu naḡ iḡ gic bata têḡ mac, naḡ sa.

²²Mac asóc yom ḡandô ḡapu su, dec ahu lêḡ ti mêtê ḡadômbwi hoḡ siḡ su, tu bu aḡkuc mêtê ḡandô atac whiḡ asidôwai-ḡga. Bocdinaḡ kwahic dec aö wateḡ mac bu akêḡ nem ḡalôm sambuc bu akôm mêtê dau ḡandô sa-ḡga. ²³Bu mac atiwakuc su. Mac atiwakuc ḡahu sip gêḡ nom-ḡga naḡ gic waê bu niḡga, naḡ daḡ dom. Mba. Mac atiwakuc ḡahu sip Anötö ndê Yom naḡ gitôm gêḡ tali, ma oc yêc ḡapaḡ eḡ. ²⁴Tôm yom naḡ sêto yêc bocdec bu:

ḡamalac nom-ḡga hoḡ sêtôm kwanḡ, ma ḡac si waê gitôm ḡaola ôm-ḡga.

Kwanḡ yêc ḡasawa apê ma tibasô, ma ḡaola bocdinaḡ kêsôlô.

²⁵Magoc Pômdau ndê yom yêc ḡapaḡ. [Ais 40:6-8]

Ma Pômdau ndê yom dau, iḡ ḡawaê ḡayham naḡ sêhoc asê têḡ mac su.

2 ¹Tu dinaḡ-ḡga dec ahu mêtê sac-sac hoḡ siḡ. Mêtê alic lau sac-ḡga hoḡ, mêtê aḡsau lau-ḡga, mêtê dasôm yom ḡayham magoc dakôm ḡandô sa dom-ḡga, mêtê lêmuḡ-ḡga ti lêḡ dapu lau-ḡga tidau-tidau, naḡ ahu hoḡ siḡ. ²Akôm ḡaḡga bu akóc Anötö ndê yom sa sip nem ḡalôm e tidônḡ, ḡalêḡ tigeḡ tôm balêkoc dedec tac whiḡ bu sênôm su. Ma tôm dinda ndê su gêm balêkoc dedec sa bu sêtiatu, dec Anötö ndê yom oc kôm mac nem akêḡ whiḡ êḡsôwec tiatu ma alhac ḡaḡga e atap Anötö ndê mwasiḡ nem mac si-ḡga ḡa-ḡandô sa. ³Mac aḡyalê Pômdau su ma aḡsahê su bu iḡ ndê mwasiḡ iḡ ḡayham, bocdinaḡ dec ahu mêtê sac hoḡ siḡ, ma aḡsalê gêḡ tu puc gatôm dôḡ-ḡga.

Yisu ti hoc ḡamata-ḡga andu-ḡga

⁴Atigasuc Pômdau Yisu naḡ gitôm hoc tali naḡ Anötö kêyaliḡ sa ti hoc ḡamata-ḡga bu kwê ndê andu lhac ḡahô-ḡga. ḡamalac sêtec iḡ, magoc Anötö

dau kêyaliñ iñ sa, ma gêlic iñ ñayham kêlêc. ⁵Mac bocdinañ atôm hoc tali nañ Anötö bu kwê sa ti Ñalau Dabuñ ndê andu. Ma iñ kêyaliñ mac sa ati lau dabuñ, bu anem akiñ iñ atôm iñ ndê lau dabuñsiga. Ma mac nem gwelêñ ñandô, nañ bu akêñ daôm sambuc atôm da nañ iñ oc líc ñayham, ma kôc sa tu Yisu Kilisi-nga.

⁶Tôm yom nañ Anötö sôm pi Kilisi, nañ sêto yêc bocdec bu:

Alic su nañ! Aô gakêñ hoc dañ kalhac Lôc †Sayon, nañ aô dauñ kayaliñ sa ma galic ñayham kêlêc bu ti hoc ñamata-nga andu-nga. Asa nañ kêñ whiñ iñ, nañ oc maya dau dom. *[Ais 28:16]*

⁷Mac akêñ whiñ dec alic hoc dau ñayham kêlêc. Magoc lau nañ sêkêñ whiñ dom, nañ sêtec hoc dau tôm sêto yêc bocdec bu:

Hoc nañ lau sêkwê andu-nga sêtec, nañ kwahic ti hoc ñamata-nga yêc andu dau. *[BW 118:22]*

⁸Ma yom dañ tiyham yêc bocdec:

Iñ hoc nañ lau daêsam oc sêtiñ gahi pi ma sêpeñ. *[Ais 8:14-15]*

Ñac sêpeñ, ñahu bu sêtec yom pi Kilisi, tôm yom nañ Anötö hoc asê gwanaj su.

Anötö ndê lau si lêñ

⁹Magoc Anötö, nañ kêgalêm mac sa bu ahu ñasec siñ ma ambo iñ ndê ñawê atu ñalôm, nañ kêyaliñ mac sa muñ su ati iñ ndê, ma bu ati gôlôwac dabuñ toñ tigeñ, ma anem akiñ iñ gitôm lau dabuñsiga nañ sem akiñ ñac si Kiñ. Iñ kôc mac sa ati iñ dau ndê lau, tu bu ahoc yom asê pi gêñ atu-tu hoñ nañ iñ kôm tu mac-nga. ¹⁰Muñ-nga mac Anötö ndê lau dom, magoc kwahic dec ati Anötö ndê lau solop. Ma muñ-nga mac atap iñ ndê tawalô sa dom, magoc kwahic dec mac atap sa su.^a

¹¹Aneñ lau atac whiñ-nga. Nom dindêc ti mac nem malam ñandô dom, magoc mac ambo atôm lau apa. Aô bu wanem la mac bu akôm mêtê sac-sac ñalôm akwa-nga ñandô sa dom. Bu mêtê kaiñ dinañ gitôm ñacyo nañ gic siñ têt mac ñapañ, ma gitôm bu señ mac nem gatôm su. ¹²Mboe lau nañ sêkêñ whiñ dom, nañ oc sêngôliñ yom pi mac, ma sêsôm bu mac lau akôm sac-nga. Magoc ambo awhiñ ñac ma ayob bu akôm mêtê ñayham eñ, dec ñac oc sêlic bu mac nem lêt ti sakiñ hoñ ñayham, ma mboe oc ti lêt bu sênem dau kwi ma sêkôc Anötö sa ti ñac si Pômdau, ma sêmpiñ iñ têt ndoc iñ mbu têt yac meñ.

Dasôc gôliñwaga ti ñadaui ñapu

¹³Tu Pômdau-nga dec asôc lau hoñ nañ sem gôliñ sêmbo nom, nañ ñapu. Asa nañ ti mac nem kiñ atu, nañ asôc iñ ñapu. ¹⁴Ma lau nañ kiñ

^a **2:10** Pita kôc gauc pi yom nañ propet akwa Hosea to muñ su. Anötö sôm têt Hosea bu sam iñ ndê balêkoc dañ bu ‘Aneñ lau dom’ (Hos 1:9; 2:23b), ma dañ bu ‘Lau nañ aô atac whiñ ñac dom’ (Hos 1:6; 2:23a). Balêkoc lu dinañ sêti dôhôn lau Israel-nga nañ dañgapêc têt Anötö. Magoc tiñambu iñ tawalô lau Israel-nga, dec sam ñac bu ‘Aneñ lau’ (Hos 2:1, 23b) ma ‘Lau atac whiñ-nga’ (Hos 2:1, 23a).

dau kêkiñ bu sênem gôliñ gameñ ñatô, nañ asôc ñac ñapu bocdinañ. In kêkiñ ñac bu sêkên ñagêyô têt lau nañ sêkôm sac, ma bu sêtoc lau nañ sêkôm ñayham, nañ sa. ¹⁵Bu Anötö tac whiñ bu mac akôm mêtê ñayham eñ, e lau gauc mbasi-ñga nañ sênjalê in ti ndê yom dom, nañ sênjapic whasuñ ahuc, ma tôm dom bu sênjôliñ yom pi mac. ¹⁶Ambo atôm lau akiñ ñambwa dom, magoc ambo atôm lau nañ sêti ñadau dau. Magoc gauc nem bu yom dau kêt ñasawa têt mac bu asa lêt sac-ñga dom. Mba. Bu kwahic dec mac ati Anötö dau ndê lau akiñ, dec asa nem lêt ñkuc in ndê atac whiñ. ¹⁷Atoc lau hoñ sa ñapep, ambo ti atac whiñ asidôwai sêkên whiñ-ñga hoñ, atôc Anötö ti asôc in ñapu ñapep, ma atoc nem kiñ nom-ñga sa.

¹⁸Mac lau nañ am akiñ ñadaui, asôc ñac ñapu ma atoc ñac sa ñapep. Akôm ñalêt tigeñ têt ñadaui ñayham nañ sêyob mac ñapep, ma têt ñadaui sac nañ si ñalôm apê, nañ bocdinañ. ¹⁹⁻²⁰Mac bu akôm sac dom, magoc sêkên ñandê têt mac tu añjalê Anötö ma ñkuc in-ñga, dec ahôc gêt dau, ma gauc nem bu Anötö gitôm bu êmwasiñ mac ô ñandê dinañ. Magoc mac bu akôm sac ma sêndic mac, nañ tamkwê mwasiñ dañ ô ñandê dau dom, bu in lêt solop bu sêmatôc mac.

Tañkuc Kilisi ndê dôhôn hóc ñandê-ñga

²¹Bu lau nañ Anötö kêgalêm ñac sa, nañ sic waê bu sêhóc ñawapac kaiñ dinañ. Ñahu bu Kilisi hóc ñandê tu mac-ñga bocdinañ, dec tôc dôhôn têt mac bu ñkuc-ñga. ²²Tôm yom nañ sêto yêc nañ sôm bocdec bu:

In kôm sac dañ dom, ma sôm yom sac dañ sa whasuñ dom. [*Ais 53:9*]

²³Têt ndoc lau sêsôm yom sac-sac pi in ti sêpu in, nañ in sôm yom sac dañ ô dom. Ma têt ndoc sêkên in hóc ñandê, nañ gic ndoc ñac bu kêt ñagêyô-ñga dom. Mba. In kêt dau sambuc sip Anötö amba, nañ oc êmatôc gêt hoñ ñalêt gitêt. ²⁴In hóc yac neñ sac ñagêyô pi dau ñamlic, têt ndoc in mbac ndu pi a gicso dau. In kôm bocdinañ tu bu yac dahu mêtê sac siñ gitôm lau batê sêhu gêt nom-ñga siñ, ma dambo tañli ti dasa lêt gitêt eñ. Mêtê sac in gitôm gêmbac atu nañ kôm yac hoñ, magoc ñandê atu nañ Yisu hóc, nañ kôm yac ñayham sa tiyham. ²⁵Bu muñ-ñga mac akôm mêtê sac tidau-tidau tôm domba nañ si ñadau mbasi, ma sêmbo babalip. Magoc kwahic dec mac ambu atêt ñgac ñayham yob domba-ñga, nañ yob mac nem gatôm ñapep eñ.

Lauwhê ma lauñgac si lêt ñayham

3 ¹Aô bu wanem la mac lauwhê whiñ bocdec bu, asôc nem akweni ñapu ñapep. Ma ñalêt dinañ mac nañ nem akweni sêkên whiñ yom ñandô dom, nañ mboe mac nem lêt ñayham oc nditôm bu nem ñac kwi ma sêkên whiñ. Ñac oc sênem dau kwi ñahu sip yom daêsam nañ mac bu

asôm tu bu anem ñac kwi-nga dom. ²Mba. Sêkac dau kwi ñahu sip ñac sêlic bu mac atoc Pômdau sa ñandô, ma asa nem lêñ ñawasi eñ.

³Mac lauwê anğô. Akôc gauc ñapep pi gêñ awê-nga tòm anem bocbin kêclauñ, me gôlôn ñamlic-nga ti ñakwê ñaôli atu-tu. Bu gêñ dinañ ñadañ oc kôm mac ati lauwê ti añôm yêc Anötö anğô-nga dom, ma bocdinañ gauc nem êñlêc dom. ⁴Gêñ nañ kôm mac ati lauwê ti añôm yêc Anötö anğô-nga, nañ lêñ ñayham ti lêñ malô nañ yêc siñ dau yêc nem ñalôm. Mêtê kaiñ dinañ Anötö tac whiñ hóc gêlêc, ma oc tòm dom bu ñinga. ⁵Bu lauwê dabuñ muñ-nga-nga nañ sêkêñ whiñ Anötö, nañ sêñkuc lêñ tigen dinañ. Ñac sêsôc si ñgaci ñapu, dec sêti lauwê ti anğô. ⁶Gauc nem Sara, nañ sôc iñ nakweñ Abraham ñapu ma sam iñ bu ndê ñadau. Ma mac bu akôm mêtê ñayham eñ, ma atôc daôm tu gêñ dañ-nga dom, nañ mac atôm Sara ndê atuwêi.

⁷Ma aö bu wanem la mac lau-ñgac whiñ bocdec bu. Mac añyalê su bu mac nem lauwêi si licwalô gitôm mac nem dom. Bocdinañ ayob bu asa lêñ ti gauc tu ambo awhiñ ñac-nga, ma bu atoc ñac sa ñapep. Ma gauc nem bu mac hoñ oc atap Anötö ndê mwasiñ andôc tamli-nga sa awhiñ daôm. Mac launğac añkuc lêñ dinañ, dec gêñ dañ oc lhac mbec nañ ateq têtñ Anötö, nañ ahuc dom.

Lêñ ñayham bu lau sêkêñ whiñ-nga hoñ sêñkuc

⁸Aö bu wasôm yom ñatô tiyham nañ gic waê mac hoñ. Ambo awhiñ daôm ti ñalôm tigen. Tamwalô nem asidôwai nañ sêhóc ñawapac, ma anem ñac sa bu atôc nem atac whiñ ñac-nga asê. Ma ahu gauc atoc daôm sa-nga hoñ siñ. ⁹Lau bu sêpu mac me sêkôm mêtê sac tidau-tidau têtñ mac, nañ ayob bu akôm ô dom. Magoc asôm yom ñayham ma anem mbec lau dau. Ñahu bu Anötö kêgalêm mac sa bu atap iñ dau ndê mbec ñamwasiñ sa. ¹⁰Gauc nem yom nañ sêto yêc bocdec:

Asa nañ tac whiñ bu mbo ñayham tòm iñ ndê têtñ mbo tali-nga, nañ yob whasuñ têtñ yom sac-sac ma yom tasan hoñ. ¹¹Iñ puc dômbwê mêtê sac hoñ ma kôm mêtê ñayham eñ, ma êñsahê ñanğa bu sa ndê lêñ hoñ malô eñ.

¹²Ñahu bu Pômdau tatiñ lau gitêñ ma kêtñ dañga ñac si mbec. Magoc iñ atac tec ma anğô yaê lau sêkôm sac-nga. *[BW 34:12-16]*

Lau nañ sêsa lêñ gitêñ, nañ oc sêtap kisa sa

¹³Mac bu akêñ nem ñalôm sambuc tu akôm mêtê ñayham-nga, dec asa oc kêtñ sac mac? ¹⁴Magoc mac bu ahóc ñawapac ma atap kisa sa tu asa lêñ gitêñ-nga, nañ atôc daôm ti ahêgo daôm dom, bu mac atap Anötö ndê mwasiñ sa su. ¹⁵Apo Kilisi sa ti Pômdau ndôc nem ñalôm. Akôc gauc ñapan pi Anötö ndê mwasiñ ñayham nañ mac tamkwê ambo, dec têtñ bocke lau bu sêndac mac pi gêñ dau, nañ mac atôm bu awhê gêñ

dau nahu sa têtj n̄ac. ¹⁶Magoc akôm gêtj dau ti asap lêtj malô dôj, ma atoc lau hoj sa. Ayob daôm bu asa nem lêtj hoj n̄apap eij, dec oc tôm bu ambo ti atac pa su bu mac nem giso mbasi. Ma lau nanj sêpu lêtj n̄ayham nanj mac asa tu akêtj whiŋ Kilisi-n̄ga, nanj oc maya dau tu n̄ac si yom-n̄ga. ¹⁷Anôtô bu kêtj n̄asawa têtj lau bu sêkêtj n̄awapac têtj mac tu akôm mêtê n̄ayham-n̄ga, nanj n̄ayham, hôt gêlêc sêkêtj n̄awapac têtj mac tu akôm mêtê sac-n̄ga.

Kilisi ndê mbac ndu n̄a-n̄andô

¹⁸Bu Kilisi dau mbac ndu tidim tigej tu lau hoj si sac-n̄ga. Kilisi iŋ n̄gac gitêtj, tigej iŋ hôt n̄awapac dau ô yac lau dakôm sac-n̄ga, bu êmasan lêtj datigasuc Anôtô-n̄ga. Iŋ mbac ndu gitôm n̄amalac ti n̄amlic nom-n̄ga, magoc Anôtô uŋ iŋ sa ti n̄alau. ¹⁹Ma ti n̄alau dec iŋ gi hoc ndê tisa n̄awaê asê, têtj n̄alau nanj sêndöc gapocwalô. ²⁰N̄alau dinaŋ,^b n̄ac dan̄gapêc têtj Anôtô têtj Noa ndê têtj. Têtj têtj dinaŋ Anôtô kôt ndê n̄alôm dôj, ma hôtj Noa bu ndic dabiŋ waŋ atu nanj iŋ sô. Ma waŋ dau gêm lau 8 solop si têtj ndoc bu suŋ atu. ²¹Bu dau tôm d ôhôtj tu busan̄gu nanj gêm mac lau têtj kwahic dec-n̄ga si. Busan̄gu dau gêm mac sa bu kêtjwasin̄ n̄adômbwi n̄amlic-n̄ga su n̄ambwa dom. Magoc bu dau gêm mac si bu iŋ piŋ mac dôj am damiŋ Yisu Kilisi tu iŋ ndê tisa akêtj lau batê-n̄ga, ma tôt asê bu mac amatiŋ pwac awhiŋ Anôtô bu asa nem lêtj n̄awasi eij ambo iŋ an̄gô-n̄ga. ²²Ma Kilisi dau pi undambê gi su, ma ndöc Anôtô ndê andô-n̄ga, ma aŋela ma gôliŋ ti n̄aclai hoj sêsôt iŋ n̄apu.

Lau sêkêtj whiŋ-n̄ga si lêtj

4 ¹Kilisi hôt n̄andê ma mbac ndu tôm n̄amalac, ma boc-dinaŋ dec akôt gauc pi iŋ ndê lêtj dinaŋ, ma amasan daôm bu an̄kuc iŋ. Bu asa nanj töt dau dom bu hôt n̄andê tu Kilisi-n̄ga, nanj töt asê bu iŋ tec lêtj mêtê sac-n̄ga. ²Ma boc-dinaŋ mêtê sac n̄alôm n̄agalac-n̄ga oc tôm dom bu nem gôliŋ iŋ tiyham, ma iŋ oc sa ndê lêtj hoj tôm Anôtô ndê atac whiŋ, e iŋ ndê têtj mbo tali-n̄ga pacndê. ³Bu têtj baliŋ hic su mac akôm mêtê sac tidau-tidau, tôm lau nanj sem gauc Anôtô, nanj sêkôm. Lau kaiŋ dinaŋ sêŋgamiŋ dau têtj mêtê sac dan̄ dom. Sêkôm mêtê n̄alôm n̄agalac-n̄ga ti mockaiŋ-n̄ga maya pac, seŋ asam ti sênôm gêtj êŋiŋ n̄ac-n̄ga n̄apanj, ma sêkôm mêtê sac tu sênem akiŋ gwam-n̄ga. ⁴Ma kwahic dec sêlic bu mac lau akêtj whiŋ-n̄ga ahu n̄ac si mêtê wachuc ti lêtj sêkôm mêtê sac

^b 3:19-20 Yom dau nahu yêc awê dom. Lau n̄atô gauc gêm bu n̄alau dinaŋ, n̄ac aŋela sac nanj dan̄gapêc têtj Anôtô têtj Noa ndê têtj, dec iŋ kêtj n̄ac sêndöc gapocwalô n̄apanj (alic Gen 6:1-3 ma 2 Pit 2:4). Ma lau n̄atô gauc gêm bu n̄ac lau nom-n̄ga nanj dan̄gapêc têtj Anôtô têtj Noa ndê têtj, nanj si n̄alau. Ma yom nanj Yisu hoc asê têtj n̄alau dinaŋ, nanj bu töt asê têtj n̄ac bu iŋ ku n̄ac ti iŋ ndê n̄acyo hoj dulu, têtj ndoc iŋ mbac ndu pi a gicso dau ma tisa tiyham.

bambaliŋ-nga siŋ su, dec ŋac gauc gêm yom daêsam ma sêmbaliŋ yom ŋamalac daêsam pi mac, tu sêpu mac-nga. ⁵Magoc Anötö oc êŋsu lau dau pi ŋac si mêtê têtŋ iŋ ndê bêc êmatôc lau-nga. Iŋ kêmasaŋ dau su bu êŋsahê lau naŋ sêmba tali ti ŋac naŋ sêmbac ndu su. ⁶Tu yom dinaŋ-nga dec sêhoc ŋawaê ŋayham asê têtŋ lau. Ma lau naŋ sêmbac ndu su, naŋ si sêmbac ndu kêkuc lêŋ matôc-nga naŋ lau nom-nga hoŋ sic waê bu sêtap sa tu sêkôm sac-nga. Magoc tu ŋac sêŋgô ŋawaê ŋayham su-nga, dec ŋac si gatu gitôm bu oc mbo tali whiŋ Anötö.

⁷Têm meŋ kêpiŋ su bu gêtŋ kwahic dec-nga hoŋ oc niŋga. Bocdinaŋ atimêtê daôm ŋapap ma ambo ti gauc ŋawa tu aterŋ mbec-nga. ⁸Asap mêtê atac whiŋ asidôwai-nga dôŋ hóc gêlêc mêtê ŋayham hoŋ su. Bu asa naŋ mêtê atac whiŋ-nga gêm iŋ ahuc, naŋ tôm bu suc sac bocke naŋ iŋ ndê asidôwai sêkôm têtŋ iŋ ŋapaŋ, naŋ kwi. ⁹Akôc lau sa ti andic ya ŋac, ma akôm ti atac ŋayham eŋ. ¹⁰Anötö gic sam iŋ ndê mwasinŋ têtŋ mac hoŋ bu akôm gwelêŋ tidau-tidau. Akôc mwasinŋ dau sa ŋambwa dom, magoc mac tigeŋ-tigeŋ anem akiŋ nem asidôwai ŋapap tôm mwasinŋ dau puc mac dôŋ. ¹¹Am asa naŋ tap mwasinŋ hoc yom asê-nga sa, naŋ sôm yom tôm Anötö dau sôm yom sa am whamsuŋ. Am asa naŋ bu nem akiŋ gôlôwac dabuŋ, naŋ nem akiŋ tôm licwalô naŋ Anötö kêŋ têtŋ am. Ma tu sakiŋ tidau-tidau naŋ mac hoŋ akôm-nga, naŋ dec lau oc sêmpiŋ Anötö tu Yisu Kilisi-nga. Datoc iŋ sa tu iŋ ndê ŋawasi ti ŋaclai-nga tôm têtŋ hoŋ ndi. Yomandô.

Lau naŋ sêkêtŋ whiŋ Kilisi oc sêtap kisa sa

¹²O aneŋ lau atac whiŋ-nga. Asô tu ŋawapac ti kisa naŋ kwahic dec mac ahóc, naŋ-nga dom. Alic tôm gêtŋ wakuc naŋ am gauc ŋahu, naŋ dom. ¹³Magoc atac ŋayham bu mac awêkaiŋ Kilisi ndê lêŋ hóc ŋandê-nga. Ma bocdinaŋ têtŋ ndoc iŋ mbu meŋ, ma lau hoŋ sêlic iŋ ndê ŋawasi atu, naŋ mac oc atac ŋayham atu bocdinaŋ. ¹⁴Lau bu sêpu mac tu Kilisi ndê ŋaê-nga, naŋ gauc nem mwasinŋ atu naŋ mac atap sa su, bu Anötö ndê ŋalau ti ŋawasi atu mbo whiŋ mac.

¹⁵Aô gasôm yom dec hêganônŋ ŋandê ti ŋagêyô naŋ lau sêhóc tu sic yomsu nom-nga popoc-nga dom. Mba. Bu mêtê dandic ŋamalac ndu-nga, danem kaŋ gêtŋ-nga ma taŋgalôm lau daŋ si yom-nga, naŋ gic waê lau sêkêtŋ whiŋ-nga dom. ¹⁶Magoc mac bu ahóc ŋandê tu aŋkuc Kilisi-nga, naŋ mayam daôm dom, magoc ampiŋ Anötö bu iŋ hê Kilisi ndê ŋaê pi mac. ¹⁷Bu ŋawapac bocke naŋ tap yac sa têtŋ têtŋ kwahic-nga, naŋ meŋ bu êŋsahê Anötö ndê lau yac muŋ. Bocdinaŋ oc ŋalêŋ mba bu lau naŋ sêkêtŋ whiŋ Anötö ndê ŋawaê ŋayham dom, naŋ sêŋlêc saê ti ŋawapac têtŋ têtŋ ŋambu-nga. ¹⁸Tôm yom naŋ sêto yêc naŋ sôm bu:

Lau gitêtŋ naŋ sêtap Anötö ndê mwasinŋ nem ŋac si-nga sa, naŋ sêŋlêc ŋawapac dom. Bocdinaŋ lau naŋ daŋgapêc têtŋ Anötö ma sêkôm sac ŋapaŋ, naŋ oc sêlhô su dom andô.

[Prov 11:31]

¹⁹Bocdinaŋ Anötö bu kêŋ ŋasawa têtŋ lau bu sêkêŋ ŋawapac têtŋ mac lau naŋ ati iŋ ndê, naŋ gauc nem yom daêsam e ahu mêtê ŋayham siŋ dom. Magoc akêŋ daôm sambuc asôc iŋ amba ŋapu, bu iŋ kêmasaŋ mac ti gêŋ hoŋ, ma oc hu mac siŋ dom.

Pita gêm la lau bata ma lau wakuc ti lau hoŋ

5 ¹Kwahic dec aö bu wanem la lau bata naŋ sêyob mac. Aö dauŋ ŋgac bata daŋ, ma aö dauŋ galic Kilisi hôc ŋandê ma mbac ndu. Ma aö oc wawêkaiŋ iŋ ndê ŋawasi naŋ oc meŋ sa tiawê têtŋ bêc iŋ mbu meŋ-ŋga. ²Mac lau bata, ayob Anötö ndê domba naŋ sêmbo mac nem gôliŋ ŋapu, naŋ ŋapep. Akôm tu lau sêŋyaliŋ mac sa ti sêkac mac-ŋga dom, me tu akôc ŋaôli-ŋga dom, magoc ayob ŋac ti atac ŋayham ma ti nem ŋalôm sambuc tu anem akiŋ Anötö-ŋga. ³Ma atôc dôhônŋ ŋayham têtŋ Anötö ndê domba naŋ sêmbo mac ŋapu. Mac ŋadau ŋac, magoc atoc daôm sa me akôm gêŋ ti ŋaŋga têtŋ ŋac dom. ⁴Ma têtŋ ndoc Yisu, naŋ ti lau sêyob domba-ŋga hoŋ si ŋgac atu, naŋ mbu meŋ, naŋ iŋ oc kôc mac sa ma kêŋ ŋaôli ŋayham ti ŋawasi atu têtŋ mac, naŋ oc niŋga dom.

⁵Mac lau wakuc, daŋam wambu ti asôc nem lau bata ŋapu. Ma mac lau hoŋ akôc gauc daêsam pi daôm me apo daôm sa hôc gêlêc nem asidôwai dom, magoc ambo ti aŋgwiniŋ daôm. Bu Anötö ndê yom daŋ, sêto yêc bocdec bu:

Anötö kêgwiniŋ lau naŋ sêtoc dau sa, magoc kêmwasiŋ lau naŋ sêŋgwiniŋ dau. *[Prov 3:34]*

⁶Tu dinaŋ-ŋga dec ambo Anötö ndê ŋaclai ŋapu ma aŋgwiniŋ daôm, ma bocdinaŋ têtŋ ndoc naŋ iŋ gêlic ŋayham, dec iŋ oc po nem waêm sa. ⁷Gêŋ bocke naŋ kêŋ wapac mac, naŋ akêŋ sip Anötö amba, ŋahu bu iŋ gauc gêm mac ŋapaŋ, ma tac whiŋ bu nem mac sa.

⁸Atimêtê daôm ŋapep ma anem ali, bu mac nem ŋacyo Sadaŋ kêsalê ŋasawa tu bu êntôm mac-ŋga ŋapaŋ. Iŋ gitôm layon naŋ taŋ atu ma kêsêlêŋ kêgihi ŋapaŋ ma kêsalê gêŋ tu neŋ-ŋga. ⁹Alhac ŋaŋga ma asap nem akêŋ whiŋ dôŋ bu akêŋ ŋasawa daŋ têtŋ Sadaŋ dom, ma amasuc iŋ su. Ma gauc nem bu mac nem asidôwai sêkêŋ whiŋ-ŋga naŋ sêmbo nom ŋagameŋ hoŋ, naŋ sêŋsahê ŋawapac kaiŋ tigeŋ tôm mac.

¹⁰Anötö iŋ mwasiŋ hoŋ ŋadau naŋ kêgalêm mac sa bu piŋ mac dôŋ anem damiŋ Kilisi, ma awêkaiŋ iŋ ndê ŋawasi naŋ oc niŋga dom. ŋasawa sauŋ iŋ oc êŋgaho mac su yêc ŋawapac naŋ kwahic dec mac ahôc, ma iŋ oc ndic seŋeŋ mac ma puc mac dôŋ ŋa iŋ ndê ŋaclai, bu alhac ŋaŋga. ¹¹Iŋ ndê ŋaclai atu oc yêc ŋapaŋ. Yomandô.

Pita gic bata ndê yom

¹²Sailas naŋ galic gitôm aneŋ asidôwa ŋandô tu puc aö dôŋ-ŋga, naŋ gêm aö sa dec alu ato bapia apê dindec têtŋ mac. Bapia dau bu puc yom pi

Anötö ndê mwasiŋ dôn bu gêŋ ŋandô, ma êŋgilí mac bu tamkwê mwasiŋ dau ŋapaŋ.

¹³Lau sêkêŋ whiŋ-ŋga naŋ sêndöc malac Babilon,^c naŋ Anötö kêgalêm sa sêti iŋ ndê lau sêwhiŋ mac, naŋ sêkêŋ si acsalô têŋ mac. Ma Mak, naŋ galic gitôm aneŋ balê, naŋ bocdinaŋ. ¹⁴Akam daôm aŋkuc lau sêkêŋ whiŋ-ŋga si lêŋ. Yom malô têŋ mac hoŋ naŋ akêŋ whiŋ Kilisi.

^c **5:13** Pita to yom pi malac Babilon, magoc lau daêsam gauc gêm bu yom dau hêganôn malac Rom.